

VEDR. NY OPPSTART AV PLANARBEID - OMRÅDEPLAN FOR ALVERSUND, GNR.137 BNR. 130 MFL.

Merknad frå Håkon Glatved-Prahl:

Området er i gjeldande kommunedelplan vist som «framtidig offentlig føremål, område for bustadbygging, næring og LNF (Landbruk, natur og friluftsliv)». Det synest eg er ei fornuftig formulering som må bli ståande. Spesielt med tanke på å utvikla området innan LNF. Eg vil såleis protestera mot framlegget om å opna for annan aktivitet, og særleg dette med lokalisering av ei framtidig fleirbrukshall, som på ingen måte passar inn i området.

Dette er ei av dei siste grønne lungene i Alversund ein bør ta godt vare på. Størstedelen av området er i dag dyrka mark, der tre bønder steller jorda og slår graset. Det vil vera eit overgrep mot området å planera ut eit stort areal med det føremålet å byggja ein hall og mange parkeringsplassar som nødvendigvis følgjer med. Ein slik hall vil ruva i landskapet og framstå som eit landemerke i og med at dette området ligg på eit platå over Alversund-bygda med kyrkja rett nedanfor.

Eit anna ankepunkt mot ein såkalla fleirbrukshall er at det vil medføra veldig stor biltrafikk til og frå området, både på dagtid og kveldstid. Det er absolutt ingen tente med. Her bør ein tenkja langsiktig og plassera hallen i området sør for Alversund skule, som det til no har vore full semje om. Det er ingen tvil om Alversund bør ha ein idrettshall og gjerne fleirbrukshall, men det er etter mi meining dessverre korttenkt å knabba eit av jordbruksområda i bygda, eit område som kan byggjast ut til heilt andre føremål.

Eg er vel vitande om at plassering av ein eventuell fleirbrukshall er karakterisert som ei «problemstilling» i planområdet og at ingen ting på langt nær er avgjort. Men eg har ei ekkel kjensle av at nokon har applaudert ideen om raskt å byggja ein fleirbrukshall i Alversund akkurat på dette området, fordi det vil innebera den klart kjappaste sakshandsaminga og byggjetid. Men eg håpar eg tek feil. Eg trur ikkje politikarane vil handla ut frå ein slik tankegang. Framtidsretta, langsiktig planløyising bør vera målet.

Deler av det aktuelle området har dei siste åra vore nytta til leike- og rekreasjonsområde for elevar ved Alversund skule. Det har berre vore positivt. Den tradisjonen kan klart halda fram, spesielt når ein får sikra vegkrysset ved skulen (dessverre med ein overgang i staden for ein undergang). Eg har heller ingen ting imot at det kjem annan aktivitet knytt til grønne miljøet. Heller ikkje at det kjem bustader. Helselaget sin planar om eldrebustader synest eg også om. Det er altså dei vage, men sikkert målretta planane om ein fleirbrukshall som bekymrar meg.

Eg er nabo med eige gardsbruk tett attmed dette området. Men i tillegg har eg omsut for kva som vil skje i Alversund i framtida. Vi må ikkje stella oss slik at vi struper bygda. Framskritt og utvikling er vi alle samde om, men det må vera gjennomtenkt og med ein tidshorisont som strekkjer seg lenger enn få år framover.

Eg stiller meg difor svært undrande til at dette har fått slik hastverk no, med ein uttalefrist i løpet av første sommarmånaden. På eit veldig godt møte i Alversund grendelag nyleg var det full semje om at ideen/tankane/problemstillinga om ein fleirbrukshall på dette området er som å gå med ryggen inn i framtida. Å la dette vakre grøntområdet bli oppslukt av ein stor hall med masse asfalt og biltrafikk, vil vera særdeles korttenkt politikk.

Alversund, 30. juni 2010.

Håkon Glatved-Prahl